

ORATIO VOTIVA

PRO

Auspicali Gubernatione

SERENISSIMI PRINCIPIS

AC DOMINI,

DN. FRIDERICI V.

PALATINI RHENI, S. R. I.

ARCHIDAPIFERI ET ELECTO-

RIS, DVCIS BOIARIE

pridie Kal. Septemb.

In Augustissima Academia HEIDELBER-

GENSIS panegyri habita

A B

HENRICO ALTING, Sacrarum lisc-
rarum Professore publico.



HEIDELBERGÆ;

Typis GOTTHARDI VOEGELINI.

Anno M. DC. XIV.

GRANT'S REPORT

1870

REPORT OF THE

COMMISSIONER OF THE

LAND OFFICE

FOR THE YEAR 1870

WASHINGTON

1871

PRINTED BY

THE NATIONAL

PRINTING OFFICE

WASHINGTON

1871


RECEIVED

THE NATIONAL

PRINTING OFFICE

WASHINGTON

1871



SERENISSIMO PRINCIPIS

AC DOMINO,


DN. FRIDERICO V.

PALATINO RHENI, S. R. I.

ARCHIDAPIFERO ET ELECTO-

ri, Duci Bojariæ,

Domino suo clementissimo.

 *UÆ affectus devoti vota pro auspicali C^{na}. V^a. gubernatione in Panegyri Academicâ nuper concepiti, Princeps Serenissime, commissa pralo & in paucas contracta pagellas jussus offero. Non sustinent quidem illa judicia Lectorum, ut quæ tam ordine tractationis quàm genere dictationis infra argumenti majestatem longissimè subsidunt: attamen quia clementissimis auribus accepta, atque insuper ad pralum à C^{re}. V^a. fuere expetita; meum esse duxi, obsequii proprii majorem habere rationem, quàm judicii alieni. Quod unum ad tenuitatis meæ conscientiam &*

apud alios excusationem plus quàm satis arbitratuſ, Deum Opt. Max. ſupplex veneror, ut & hac & alia innumera, calidis pectoribus effuſa, in C^{re}. V^a. rata facere, eamq^{ue} omnigenã benedictione ornare, beare dignetur in ſeculorum ſecula.


ſcripſi Heidelbergæ Kal. Octob.

M. DC. XIV.

Ceſtitud^{is}. V^a.

humiliſſimus ſervuſ

Henricuſ Alting,



SERENISSIME PRINCEPS
ELECTOR, DN. CLEMENTISSIME,

Duo sunt dies, qui festi maxime-
q; solennes Regibus & Principi-
bus esse consueverunt, Ortus &
initi Principatus. Satis id testa-
tur anniversaria Natalitiorum & Imperio-
rum repetitio, sacris juxta & profanis mo-
numentis celebrata, quâ lætis votis vocibus-
q;, faustâ congratulatione illorum recolitur
memoria. Vtrius verò diei major censenda
sit solennitas, in dubio positum videtur. Et-
enim cum Ortus lucis vitalis usuram nas-
centibus impertiat; cum ei quotquot nas-
cuntur Principes non vitæ modò benefi-
cium, sed etiam dignitatis Principalis orna-
mentum, acceptum referant, equidem præ-
rogativam aliquam honoris non sine causâ
sibi vindicat. Contrâ cum Principes non
sibi sed Principatui nascantur, sicut bono
Reipubl. nati salutantur antiquâ formulâ,

tanto dignior est Ortu Principatus, quanto finis mediis potior habetur. Cum etiam ordinis hujus non paucos *ostendant* tantum *terris fata, neq, ultra Esse sinant*; quod de Marcello dictum à Virgilio, de HENRICO-FRIDERICO Britanniarum Principe præmaturâ morte sublato, meritò usurpamus; annon majus quid ampliusq; censere fas est, initiatos Imperiis Principes quàm natos videre? Quod si igitur Cⁿⁱ. V^r. ad ipsas cunas Electorales optatissimos suos natales, ceu fausti cujusdam syderis exortum, gratulatus est Amplissimus Vir, Marquardus Freherus, in illis quas ex imis antiquitatis visceribus eruit, inq; lucem protulit, Familiæ Palatinæ Originibus: quanto hoc tempore justior gratulationis causa est, quo C^{do}. V^r. teneros infantia, dubios pueritiæ, præcipites adolescentiæ annos supergressa, Electoratum Palatinum à laudatissimis Majoribus sibi relictum, & à Celsissimo Principe ac Domino, D. IO ANNE, PALATINO BIPONTINO, fidelissimè, felicissimè, tranquillissimeq; administratum suscipit, & regiminis Electoralis sceptrum, lætan-

lætantibus subditis, acclamantibus vicinis, gratulantibus sociis, plenâ manu capeffit?

Optarem verò illum ipsum Freherum, virum sanè incomparabilem, quam ad Ortum, eam ad auspicalem Cⁿⁱ. V^r. Principatum, adferre potuisse gratulationem. Quia verò secus visum supremo vitæ mortisq; arbitro, qui ipsum nuper admodum, non absque magno rei tum Palatinæ tum literariæ damno, terris ereptum cœlis intulit; ego etsi minimè omnium idoneus, maximè tamen omnium Cⁿⁱ. V^r. ob innumera sua in me beneficia devinctus, hoc gratandi officium pro virium mearum tenuitate præstare volui. In quo licet multa occurrant, quæ humilimi officii conatum retardare, vel etiam conantem aliquid hujus aditu loci possint prohibere, Majestas Cⁿⁱ. V^r. tempore hoc inaugurali longè fulgidissima, Illustrissimorum Principum ANHALTINORVM Serenitas, Augustus Sanctioris Concilii confessus, dignitas Academiæ, veneratio Ministerii, Hospitum frequentia, & illa lectissimorum Studiosorum corona; vincit tamen omnia ista devo-

devotissimus animi mei in C^{nem}. V^{am}. affectus, qui cum vel mutum posset in verba solvere, quidni balbutientem ad dicendum propellat & audacem faciat?

Solent autem in hujus generis Panegyricis dissertationes institui de Virtutibus Principis; de ipsius erga Deum, erga se ipsum, erga subditos officio; de optimâ regiminis formâ. Quæ aliâq; vel ex antiquorum Oratorum Panegyricis repetitâ, vel ex probatorum Historicorum fontibus derivata, huc adducerem, si instruere Principem, quàm ei gratulari rebus præsentibus convenientius ducerem. Nunc quia prædicare animus est ingens illud Dei Opt. Max. beneficium, quo Unctum suum, ætate maturum, suâ manu nobis sistit, sicq; gaudia, acclamationes, vota in amplissimo hoc auditorio excitare, eò quoque comparabo orationem; ostendâmq; quid de Serenissimo Principe, FRIDERICO V. Electore suo Germania, Principe suo Palatinatus, Nutritio suo Ecclesia, Patrono Academia, Patre Patria universa, sperare & expectare possit.

Illud

Illud verò haud luculentius fecero, quàm si
 eum Principem optimum futurum demon-
 stravero. Quo elogio eos potissimùm in-
 signiendos judicarunt Majores nostri, qui
 Principatū laudabiliter defuncti, Patriæ uti-
 les, Ecclesiæ salutare exstitissent, vel sal-
 tem, qui tales se fore, non fallacibus signis,
 sed infallibilibus documentis, comprobassent.
 Quod posterius fecisse Principem no-
 strum & facere etsi nulli dubium sit, qui in-
 dolem ipsius, qui educationem, qui vitæ pri-
 vatæ consuetudinem, qui auspicatissima in-
 choati regiminis primordia cognita & per-
 spectā habet; nescio tamen an aliunde pa-
 tescat clariùs, quàm ex ea, quam perpetuò
 in ore habet, quā symboli loco ubique uti-
 tur precatiuncula, verè gemmea, magnati-
 busq; omnibus meritò usurpanda: R E G E
 M E D O M I N E S E C V N D V M V E R B V M
 T V V M. Si enim Vitellio Romæ medio
 Campo Martio inferias Neroni dante, ejus-
 q; se in gerenda Republ. exemplum sequu-
 turum proficiente, velut tristissimo omine,
 percussī sunt & prostrati Romanorum ani-
 mi:

mi : quidni lætissimo illo augurio in spem
optimam erigamur nos , quod Princeps in
deligendo absolutissimo ac planè divino ge-
rendi Principatus exemplari ostendit ? Di-
cam clariùs distinctiusq; , si possum , ut actis
firmioribus radicibus firmior sit vestra de
C^{ae}. Sⁱ. expectatio . Elector FRIDERI-

CUS uno symbolo suo tres optimi sine con-
troversia Principis notas in Sese proponit,
quòd REGI se petit; quòd à DOMINO
regi; quòd secundum VERBVM regi.
Regere Regibus Principibúsque omnibus
commune est ; regi velle non omnium est.
Reperti quippe sunt & reperiuntur , prohi-
dolor ! in ordine regnantium non pauci , qui
sive Majestatis splendore occæcati , sive mi-
nisteriorum obsequiis blanditiisq; corrupti,
regimen superioris nullum agnoscunt , sed
Deorum instar , absolutæ potestatis axioma-
te eminere se credunt in societate humana;
quorum sit præesse tantum non subesse , da-
re leges non accipere. Quo animo fuisse
legimus Pharaonem Ægypti Regem , qui de
dimittendo populo Israëlítico jussu superioris

ris Dei interpellatus, nihil ei in se imperii esse
protervè respondit. Ita Senacherib &
Nebucadnezar, alter Assyriæ, alter Babylo-
niæ, uterq; superbissimus Rex, insultare Deo
tāquam inferiori, quinetiam convitia di-
cere veriti non sunt. Nec alia mens fuit

Alladio, Caligulæ, Domitiano, procacibus
Numinis supremi contemtoribus, qui ut
Deorum se titulis insolenter jactitarunt, ita
Imperium nullis legum septis inclusum, nul-
lis justitiæ limitibus circumscriptum, in suos
exercuerunt. Optandūque esset hoc

dissolutæ potestatis venenum, quo nullum
sive ad exitium Principum, sive ad excidium
Principatum, præsentius esse potest, non
tam tenaciter adhærescere, vel saltem per
adulationem non tam pertinaciter afflari
Magnatum animis; Lætior profectò Reipub.
Christianæ passim appareret facies.

Longè alia sententia est Serenissimo nostro,
qui melioribus imbutus præceptis, non à
magistris primū traditis, sed ex sanguine
Majorum cum ipso lacte materno haustis,
nec humanâ sed divinâ voce confirmatis,

illud REGE ME, REGE ME,
 REGE ME, devotâ mente ingeminat.
 Novit quippe esse Se infinitis parasangis su-
 periozem, qui Reges, Principes, potestates
 ita constituerit in terris, ut tamen supremam
 in omnes potestatem sibi servarit in cœlis;
per quem Reges regnent & Dominatores de-
cernant justitiam, per quem Principes go-
rant Principatum. Novit in hujus manu esse
 omnium Principum *corda, ut rivus aqua-*
rum; sceptrâ, coronas, diademata in purâ
 puto ipsius arbitrio posita. Novit Reges in-
 victissimos, Principes potentissimos salutarî
 solitos, coram ipso nil nisi pulverem esse &
 cineres, *inanitatem & plus quàm inanita-*
tem; quorum *cogitationes omnes pereunt*
uno die; Regna patentissima, Principatus
 amplissimos, quantumvis militum præsidiis
 castrorum munimentis, auxiliis sociorum
 firmatos, & quasi circumvallatos, haud aliis
 tamen quàm luteis consistere pedibus, ut si
 vel minimo ejus digitulo impellantur, exi-
 tiali lapsu nunquam deinceps resurrecturi
 corruant. Novit denique eundem, Regem
 Regum,

Regum, Dominum Dominantium Inferioribus, ministris suis ac vicariis, actionum suarum omnium, privatarum, publicarum normas condidisse; quæ sunt Leges Divinæ, atque etiam Humanæ, tanquam conclusiones ex illarum principiis deductæ, à quibus in toto regimine vel latum unguem recedere grande sit nefas. Quod ipsum sicut ex libro Scripturæ longâ dictorum exemplorumque serie Principibus Christianis inculcant Theologi: ita ex libro Naturæ exstructum asseruerunt, atque etiam Principibus gentilibus tradiderunt Philosophi. Plato quidem non modò illegem Principatum gravem, sed paratum quoque interitum pronuntiavit civitati isti, in qua non Lex Magistratui sed legi præest Magistratus. Aristoteles autem tertio Politicorum Principatum Sublegem & Exlegem in eo differre docet, quòd illic præsit Deus per suam vocem, istic præsit Homo per brutos affectus. Unde Domitiano Imp. Apollonius Tyanæus: *Si tibi leges imperare non putaveris, ipse non imperabis.* Alius item ad Trajanum: *Non est Princeps*

*supra leges, sed contra leges supra Principem. Principis potestas justitiæ ponderibus semper exigenda est. Quâ voce adeo delectatum Trajanum ferunt, Imperio tum inaurandum, ut cum non multò post Præfecto Prætorii Saburano gladium daret de more, cum in se distringi juberet, si quid contra leges, contra salutem communem imperaret. Et qui eum sequuti sunt Antoninus & Severus Imppp. Principem legibus vivere, legibus se subicere, non semel rescripserunt. Omninoque digna vox est majestate regnantis, legibus alligatum se Principem profiteri: Adeo de auctoritate juris nostra dependet auctoritas, inquit laudatissimi Imppp. Theodosius & Valentinianus. Illi ipsi verò qui agnoscere superiorem ejusque leges pati superbè detrectarunt, adacti in ejus obsequium fuere etiam inviti. Pharaon mediis, quibus obrutus periit, maris rubri aquis clamans; *Fugiam à conspectu Israhelitarum: nam Jehova pugnabit pro eis*. Senacherib amisso ad Hierosolymam centum octuaginte quinque millium exercitu cum domi in-*

ter

inter ipsa sacra sceleratis filiorum manibus
obtruncaretur, statuæ suæ inscriptum reli-
quit; *Intuens in me aliquis discat esse pius.*

Nebucadnezar à vitâ belluinâ septenni ad
humanam, & ab exilio ad regnum revoca-
tus, *Nunc, ait, laudo, extolloque & glorifico*
Regem cæli, cujus omnia opera, opera veritatis,
& cujus viæ sunt viæ judicii, qui denique am-
bulantes in superbiâ potest dejicere. In quam
sententiam elatioris & præfractionis super-
cilii Reges compellat Psalter Regius: *Ani-*
maduertite, ô Reges, & eruditionem percipite,
ô Judices terra: Colite Jehovam cum reverentiâ,
& exultate cum tremore: Osculamini Filium ut
non irascatur, & pereatis in viâ, cum vel mini-
mum exarserit ira ejus.

Non ita Se-
renissimus Princeps FRIDERICVS facit.
Non diuturnâ quasi cum supremâ potestate
colluctatione fessus, fremens ac frendens, tan-
dem se subjicit; non fractus malis aut minis
territus leges accipit, sed qua est in Deum
suum pietate, in Dominum suum humilita-
te, in Patrem illum suum reverentiâ, rebus
integris, & ex voto hætenus sanè fluenti-
bus,

bus, obsequio maximè voluntario totum se submittit superiori, ei omnia sua comittit, ab eo duci, doceri, regi ut ore petit, ita sincero cordis affectu desiderat.

Duc me, nec sine me per me, Deus optime, duc.

Me ducè nam pereò, te ducè fausta gero.

Duc me Spiritu tuo bono per terram planam, & doce me facere placitum tuum, quia tu es Deus meus. Vias tuas, Jehova, notas fac mihi, semitas tuas doce me. Rège oculos meos ut intuear mirabilia legis tuæ. Doce me, Jehova, viam statutorum tuorum, quam custodiam in finem usque. Fac ut intelligam, ut custodiam legem tuam, observemq, eam ex toto animo meo.

Et à Salomone Rege precum suarum formulam mutuatus, Tu, inquit, Jehova Deus mi, constituisti me servum tuum Electorem loco FRIDERICI Patris mei, quamvis ego puer parvus nesciam procedere & redire; servum, inquam tuum in medio populi Palatini, quem elegisti, populi multi & numerosi. Des igitur Servo tuo animum tui observantè, tibi subditum, te colentem, abs te solo pendentem; des animum intelligentem ad iudicandum populum tuum,

taum, discernendo inter bonum & malum, facientem quoq; quod tibi complacitum est. Ex quibus omnibus jam secundo loco intelligitur, Auditores, quem sibi Rectorem Elector *FRIEDERICVS* delegerit. Verissimum cum de aliis tum de Principibus dictum est, multum referre quem quisque nandiscatur rectorem. Ut enim, Cicerone teste, *quales in Republ. Principes sunt, tales reliqui solent esse cives*; ita, experientia teste, *quales sunt qui regunt Principes, tales ipsi quoque Principes evadunt*. Duo verò sunt genera illorum, qui flexuosâ insinuatione obrepere Principibus, & nisi viam præcludant tempestivè, occupare eos, adeoq; partes Rectorum sibi usurpare assolent, Affectus & Adulatores. Illi adnati quasi, hi adventitii; illi in sinu, in abditissimis Principum recessibus, isti in ipsorum ministerio positi; utrique callidi, blanduli, imperiosi, perniciosi. Affectus non rationem modò de sede dejiciunt, verùm etiam Dei timorem, quo veluti lupato refranantur, cordibus excutunt, & normam regiminis hanc statuunt:

Sic volo, sic jubeo, stat pro ratione voluntas.
 Alteramq; Atræi in Tragoedia; *Sanctitas, pietas, fides, pudor, privata bona sunt, Quæ iuvat Reges, eant.* Quod sanctè inter priscos Persarum Reges eo usq; invaluit, ut suprema regni lex esset; *Liceat Regi quod lubet.* Sicut legis hujus obtentu Cambyses incestis nuptiis uxorem sibi sociavit sororem; nec quenquam passus est sibi obloqui, aut iniquissimis decretis suis, quæ immoderatissimorum affectuum intemperies suggererat, intercedere. Nec secus pleriq; ejus successores fecere, qui quam in partem suâ quemque traxit voluptas, in eam inconsultâ ratione præcipites ruerunt. Cùmque devicto tribus præliis Dario Codomannæ summa rerum ad Magnum illum Alexandrum transiret; ipse quasi in impotentis dominatus jus venisset, ita affectibus suis frænâ laxare ubiq; ac cœco impetu ferri cœpit in omnia, jam ambitioni, libidini; modò crudelitati, luxui; aliâs aliis vitiis foedissimè indulgens; planèque approbans, quod veluti malagma doloris ad indignam Clyti-
 : cædem

cædem suppeditarat Anaxarchus ; *justitiam*
propè Jovem asidere , quòd *justum sit quic-*
quid à Jove , id est , magno Rege *patratur* .
 In quo non minus , quàm in statuis suis ac
 trophæis passim excitandis , & Philosopho-
 rum principe Aristotele insectando , imita-
 torem nactus est è Romanis Bassianum Imp.
 quî sanguine fraterno nefarias manus cruen-
 tavit , qui novercam Iuliam matrimonio si-
 bi copulavit , quòd licere sibi putaret quic-
 quid luberet , & dare leges non accipere .
 Imperatorium duceret . Et quid attinet
 cumulare exempla exemplis , cum hodieq;
 nullâ in re frequentius peccetur , quàm ef-
 frænatorum affectuum plus quàm licentio-
 so regimine ; ex quo , velut exuberantissima
 scaturigine , nullum non mali genus in so-
 cietatem humanam redundat . Quemad-
 modum enim si navis , remoto gubernatore
 furori ventorum , fluctuumq; violentis assul-
 tibus relinquatur , ad vada , ad scopulos ci-
 tò adhærescit , iteratisq; illisa ictibus tandem
 frangitur ; eundem in modum si Principa-
 tus furentium affectuum æstu impetuq; re-

gatur, fieri aliter non potest, quin modò hîc modò illic graviter impingat, concutiat, & funditus intereat. Quem eventum cum recentium exemplorum memoria confirmet, fide antiquorum illustrare cum supersedeo.

Alterum genus perniciosorum rectorum esse diximus Adulatores; qui olim apud Orientales Eunuchi, apud Romanos ferè Liberti erant, quòd eo ex ordine in comitatum Principum asciscerentur; hodie Aulæ Servi communiter dicuntur. Hi obtutù oculorum, gestu corporis, appposito verborum blandiloquio, promptitudine obsequiorum, prolixâ specie honoris, & sexcentis aliis occultioribus, sed nocentioribus artibus, Principum se gratiæ insinuant; affectibus ipsorum qualibuscunque exactum morem gerunt; eoq; ipsos arctissimè sibi devinciunt, & tantum non mancipant. Quòd posteaquam consequuti sunt, obtentui sumtâ Principum auctoritate nimis multa pro libito suo agunt; figunt leges atque refigunt; & divisâ quasi potestate speciosum titulum ipsis relinquunt; auctorita-

tem Imperii sibi sumunt. Quo genere hominum primæ Monarchiæ, Assyriaca & Persica, maximè abundarunt; ubi Regibus in belluinas voluptates demersis, & ab accessu subditorum alloquioq; seclusis, rerum gubernacula insigni libidine tractarunt. Celebrantur quoque in historia Rom. qui eorundem artificiorum incantamentis summum potestatis gradum sibi pararunt, Sejanus apud Tiberium, Narcissus & Pallas apud Claudium, Laco & Icellus apud Galbam, Plautianus apud Severum, & integræ imperioforum fervorum cohortes, quæ paritidam Phocam assidue circumstiparunt.

Quorum omnium etsi parum constans aut diuturna dominatio, exitus ferè tragicus fuit; mutatis paulatim & alienatis Principum voluntatibus, odiisq; popularibus certatim in ipsos confurgentibus; mala tamen innumera per ipsos conciliata subditis, & exinde ingens ipsis Principibus malevolentia tempestas concitata est; propterea quòd Principum est, non modò non facere injuriam, sed etiam ne alii faciant providere.

Neutros agnoscit aut admittit rectores excelsus Serenissimi Electoris FRIDERICI animus. DOMINUM Iehovam, Deum Zebaoth, Creatorem cœli & terræ, Regem Regum & Dominum Dominantium, sibi expetit Rectorem; à quo vitam accepit & habitum & omnia; cuius Se gratiâ Palatinum Rheni, Septemvirum Imperii, Ducem Bojorum nuncupat. Neq; id mirum. Est enim Rector ille sapientissimus, qui rebus obscuris lucem præferre, dubiis consulere, perplexis exitum monstrare novit; est iustissimus, qui injuriam facit nemini, jus universorum absq; affectu procurat; est benignissimus, benefacere promptus, exuberantis bonitatis cornu cœlitus demittens in omnes; est potentissimus, qui dexteræ omnipotentis robore suos tuetur & asserit. Quas virtutes cum ad aliorum subditorum & clientum suorum, tum ad Regum Principumq; salutem confert. Hoc siquidem elogio præcæteris triumphat, quòd ipsis, vicariis suis, *multiplicem præstat & magnificam salutem;* quòd *benignitatem exercet erga Unctos suos,* ipsosq;

ipsosq; inter homines sacrosanctos statuit &
 Deos, quos nec facti violentiâ lædi, nec ver-
 bi contumeliâ patitur violari. Insuper
 regimen hujus Rectoris dulce est iugum, &
 leve onus, ut non gravet subjuges, nec pre-
 mat ferentes. Non derogat majestati Prin-
 cipum, utpote quo in amplioris honoris fa-
 stigium evehuntur; Deo proximi. Non
 minuit libertatem; nam *ubi Spiritus Domi-
 ni, istic libertas*; Deo servire vera libertas est;
 quo servitus illa major est, hoc ipsa libertas
 plenior est. Auctoritatem quoq; ipsorum
 minimè labefactat; siquidem ipsum hono-
 rantes honorat Dominus, instruens eos au-
 ctoritate majore, & arcanam venerationis
 vim ipsis indens, quâ spectabiliores subditis,
 hostibus autem suis formidabiliores fiant.
 De quo præclarum est Theodosii Magni,
 pientissimi Imp. exemplum; quem hoc Dei
 dono excellenter ornatum cum pro pace adi-
 ret Gothorum, eousque indomitum, Rex
 Athalaricus, & coram plenū majestatis vul-
 num intueretur, subitâ affectus veneratione;
Sine dubio, inquit, Deus ferrenus est Imperator,
contra

contra quem quicumque manus levare annixus fuerit, ipse sui sanguinis reus erit. Idem Theodosius magis semper gavisus fuit, quod subditus esset in regno Dei, quàm quod Rex audiret in regno terræ; Imitatus in eo virum illum secundùm cor Dei, Davidem, qui janitorem agere in domo Dei, quàm in tentoriis Impiorum primas tenere, omnique rerum copia affluere, maluit.

Sed tempus est, ut audiamus paucis, quam Serenissimus Princeps FRIDERICUS regiminis sui Electoralis normam profiteatur. Est illa aliis Principibus alia. Sunt qui Majorum sibi atque Antecessorum exempla proponunt; sunt etiam qui jus Humanum. Et exempla quidem mali mala, boni bona deligunt; sicut Caligulam Nero, Neronem Vitellius tanquam moribus suis convenientissimum imitari voluit: Et Cæsarem Borgia Alexandri VI. Pontificis nothum, monstrum hominis omnibus scelerum flagitiis coopertum, Principi suo prolixè commendat Machiavellus. Augustus contra melioris notæ Princeps Fortitudinem Scipionis,

onis, Benevolentiam Pompeji, & Fortunam
 Cæsaris spectavit sibi que exoptavit. Alii
 Impp. felicitatem Augusti & probitatem
 Trajani imperiis suis precati sunt. Christia-
 ni Davidem, Iosaphatum, Ezechiam, Iosiam;
 Constantinum, Theodosium, Carolum, Ma-
 ghos æmulantur. Et qui è Principibus Pa-
 latinis virtutes FRIDERICORVM, Primi
 fortitudinem, Secundi lenitatem, Tertii pie-
 tatem, Quarti sinceritatem, felici penicillo
 una in tabellâ exprimeret, næ ille optimi
 Principis ideam exhiberet. Juris autem hu-
 mani unicam formulam ingerendo Imperio
 sequuti sunt, quotquot supernâ luce necdum
 collustrati Principes, non Tyranni, & esse
 & dici voluerunt. Quanquam verò mi-
 nimè spernenda Principi exempla sunt, ma-
 la ad fugam, bona ad sequelam; etsi quoque
 juris humani, communis & singularis sive
 positivi, magna ei habenda sit ratio, non ta-
 men exactæ & omnibus numeris absolutæ
 regulæ normæve munus queunt sustinere.
 Ut enim exempla factaq; etiam optima à ju-
 re nonnunquam deflectunt; sic jus huma-
 num,

num, probum cæteroquin, à juris divini integritate alicubi deviat. Perfectior, imo perfectissima & absolutissima norma est VERBUM Dei, quod in regimine Electorali ad amissim sequendum Elector FRIDERICVS sibi proposuit. De quo si maximè non esset grave illud Dei ad populi sui Principes mandatum Deut. 17. *Rex insidens solio regni sui sumat sibi librum legis, meditetur in eo interdiu ac noctu, nec dextrorsum aut sinistrorsum ab eo recedat*; ipsa tamen ratio muneris hanc eis regulam imperaret. Cum enim Dii vicarii salutentur Principes augusto titulo, audienda sanè ipsis Lex est illius, cujus inter homines vices gerunt. Cum œconomix suæ Principalis rationem reddituri sint in censorio illo die; cujus solà præscientiâ expavescunt & expallescent cum præside Felice, quotquot malæ fidei sibi conscii sunt, omnino præscripto opus est ad quod universa ipsorum exigatur administratio. Promissio denique auxilii divini, *Non deferam, nec derelinquam te*, quâ Principes sustentantur, Principatus sustententur, quia Verbo alligata

ligata est; nemo illa frui dignè potest, nisi ad istud rationes suas rite componat. Ideo-
 q; qui supra cōmemorati fuere pii Principes,
 toto Imperii sui tēpore nihil prius, nihil ma-
 jus habuerunt, quàm ut Dei Legem non mo-
 dò sibi pararent, sed & legerent; nec legerent
 solum, verùm etiā intelligerent; nec tan-
 tùm intelligerent, sed insuper facerent. Ioæ
 Regi, annos tantùm sex nato, inter ipsa in-
 augurationis solemnia liber legis in manus
 datus, ne unquam deinceps eum è manibus
 suis deponeret. Alphonfus cognomento
 Magnanimus, Arragonum Rex, codicem
 sacrum, hujus animi sui testem, insignibus
 suis passim appingi voluit; quem etiā tam
 assiduo studio evoluit, ut non modò memo-
 riæ infixas singulas haberet historias, sed sin-
 gula etiā verba, quo ordine in ipso textu
 posita sunt, expeditè recitaret, Proavus Sere-
 nissimi Nostri, FRIDERICUS III. ne mi-
 ne & re Pius, tantis spaciis in sacro hoc sta-
 diò Alphonsum præcurrit, quanto clarior ei
 quàm alteri repurgatæ veritatis cælestis lux
 divinâ miseratione affulsit. Nunquam ille.

domi, nunquam foris absq; Bibliis fuit; & ut Alexander Magnus Homerum suum veluti præsentissimum oraculum circumtulit; quem etiam viaticum rei militaris dicere, & dormiturus sub pulvino reponere solitus est; ita Pius noster Biblia sua, illa divinitus edita oracula, ubiq; locorum circumgestavit; in manibus, in oculis, in deliciis habuit; cum iis sedere, stare, sermocinari, vigilare, cubare tanquam indivisis vitæ suæ sociis voluè duxit. Imperante Maximiliano ejus nominis Secundo, cùm Comitiis Augustanis Religio reformata, ceu crimen capitale, ipsi obiceretur, non alio quàm Bibliorum suorum clypeo se causamq; suam defendit. Postmodum quoq; Psalterium Davidicum, absolutum illud Scripturarum divinarum compendium, formâ minutulâ excudi voluit; tantùm ut gestationi commodius tum sibi tum ministris semper esset ad manus. Licet verò illis ipsis in Bibliis varii generis præcepta contineantur, quæ Reges & Principes sigillatim concernunt; præ cæteris tamen attendenda sunt ista, quæ in jure Regis edisserendo ore suo

suo Deus protulit, veluti leges fundamentales benè constituti sibiq; placentis Principatus perpetuùm futura. Hujusmodi sunt:

Ne Princeps reducat populum in Ægyptum; Ne efferat animum supra fratres, Ne multiplicet sibi equos, uxores, aurum & argentum.

Singulorum suprema fastigia delibasse satis sit in præsentia. Primum est, *Ne reducat populum suum in Ægyptum.* Terrestris quidem Ægyptus longioribus terrarum spaciis distat à populo Christiano, quàm ut reduci in eam commodè possit. Hodie quoq; eo solitudinis ac barbariei squalore oppressa jacet, ut Principes è Christianis non multi id facere desiderent. At altera spiritualis; quam Apocalypsin sequuti Papatū vocamus, proxima est, Principatus Christianos perpetuo ambitu complectens, eorumq; Principes divitiarum, regionum, honorum speciosissimis illectamentis nunquam non sollicitans. In hanc reducere populum suum, ad eam redire; interdicitur Principi Christiano. Et quid ita? Quia Deus elatâ manu populum suum inde mirabiliter eduxit, fracto Anti-

christianæ tyrannidis jugo, sublatoq; illo non laterum sed operum onere, quod neq; nos, neq; Patres nostri portare valuerunt. Quia exire inde populum suum iussit, ne particeps fiat peccatorum Ægypti, & de plagis ejus accipiat. An reduci populum convenit, unde Deus eduxit? an introire unde Deus iussit exire? Num eo quisquam validior est? Ieroboamus quod cultum vitulorum reduxisset in Iisraelem, populumq; peccare fecisset, horrendo excidio familiam suam implicuit. Valens Imperator quod pro doctrina orthodoxa Arrianam hæresin Genti Gothicæ intulisset, funesto incendio absumtus est. Nec impunitum ulli fuit suasæ aut imperatæ subditis apostasiæ peccatum: adeo Deus se non patitur irrideri. Alterum est, *Ne efferat animum supra fratres.* Fratres tertiâ repetitione vocat Deus, in quos Principi Christiano Imperium tradit, non solum communionis spiritualis cum Christo, quæ tota supernaturalis est, verum etiam ipsius sanguinis respectu. Siquidem ex uno sanguine condidit Deus universum genus humanum,

num, ut ait in actis Apostolus. Quam ejus sententiam rythmò germanico, etiam in vulgus noto, expressit Imp. Maximilianus; & Politici tanquam fontem humilitatis, & erga Subditos clementiæ Principibus commendant.

Ea quippe naturæ, ea sanguinis vis est, ut si propagine non planè corrupta à prima sua origine fluat, occultum ~~opu-~~
~~mentis~~ affectum secum ferat. Qualis se constanter prodidit in Davide Rege, qui subditos Israëlitas os suum dixit & carnem, luemq; pestiferam ab ipsis in se derivare si potuisset, voluisset. E Romanis, Titus & Trajanus eundem affectum civibus suis impenderunt; req; ipsa comprobarunt quod scribit Xenophon, *Bonum Principem nihil differre à bono patre.*

Principatus quidem conditio id habet, ut sensum illum exuat paulatim aut minuat. Qua de causa Caspar Silkius, qui in aulis Clariss. Imp. Sigismundi, Alberti II. & Friderici III. statem exegit Cancellarius, subinde optavit, Omnes Principes privatos aliquando pauperesq; fuisse, quo privatorum & paupe-

rum

rum rectè noſſent miſereri. At ſedulâ curâ
 fovendus eſt Principi Chriſtiano, nec negli-
 genda ejus retinendi media. David luc-
 reſcentem animi elationem Spiritu precum
 paſſim reprimi; nonnunquam fragilitatis
 humanæ ſortem ob oculos ponit, & com-
 mune illud, in quod omnes recidunt, Prin-
 cipium, Cinerem. Philippus Macedo
 monitorem habuit domesticum, qui quoti-
 die prodeūti è cubili occinebat, *Memento
 te mortalem eſſe*. Filius Alexander etſi opi-
 nionem divinitatis imis conceptam præcor-
 diis mordicus alioquin tueretur; tamen telo
 iſtus, cum ſanguinem largiùs mitteret, Ho-
 minem ſe eſſe faſſus eſt. Carolus Magnus
 tredecim pauperes in eodem, quo cibum ipſe
 capiebat, triclinio aluit, ut imagine hac pau-
 pertatis fortunæ ſuæ proſperitatem mode-
 raretur. Et illa tam varia miſeriæ huma-
 næ ſpectacula, adverſi illi caſus, qui undiq;
 Principum in ſublîmi poſitorum oculis ſe
 ingerunt; quid aliud monent, quàm ut ſe
 homines hominibus, mortales mortalibus
 præeſſe cogitent? Tertium eſt, Ne

multiplicet sibi equos, uxores, aurum & argentum.

Pedestrem esse Principem, sine equo agere & equitatu, nec ex Dei mente est, neq; ex Principis dignitate. Papa Rom. pœnitentiæ titulo tam abjectam conditionem Imperantibus imperat. Hoc verò spectat Deus, ut in iis quæ ad Aulæ pompam & usum Principatus faciunt pace & bello, modum servet Princeps; in apparatu quoq; bellico nec equitatu suo, nec peditatu, nec ullis præsiidiis humanis confidat. *Hi currum, illi equorum, Nos nominis Jehova Dei nostri recordamur,* Davidi in expeditionem eunti acclamant Israelitæ. Quoties cæsi iidem; quòd virium suarum fiducia insolescerent? Quoties equitatum amplissimum, peditatum numerosissimum revocare jussi ad paucos? Nimirum, perinde est Deo nostro per paucos servare vel multos. Neutrobi gloriæ suæ fructum intercipi, aut quicquam de eo decerpi patitur. Uxorū etiam non multiplicandarum meminit pro temporis illius consuetudine, quo Polygamiā Deus carnali populo suo peculiari conniventia in-

dulſit. In novo Teſtamento quamvis alia ratio ſit, conjugio ad primævam inſtitutionem per Chriſtum revocato, hunc tamen ea pars legis uſum habere poteſt, ut Principem in contrahendo matrimonio de cura religionis, in colendo de fide thori admoneat. Poſtremò quod de auro argento non coacervando additur, eò facit,

Ne Princeps exactionibus, tributis, variisq; nominis & ominis aucupiis gravet ſubditos, exhauriat ipſorum facultates, & ipſa tenuiorum oſſa emedullet. Notum eſt illud Tiberii, *Boni paſtoris eſt tondere pecus non deglubere*. Cujus quamdiu memor fuit, optimè audivit apud ſuos; ubi immemor eſſe cœpit, & cum cæde ac ſanguine omnes orbis Rom. provincias expilare, peſſimè: ita quidem, ut poſt fata tyranni terram matrem Deosq; manes obteſtaretur populus, ne mortuo ſedem ullam niſi inter impios darent. Quò verò abierunt illa omnia? Succèſſor Caligula *vicies ac ſepties millies Seſtertiũm uno nòn toto vertente anno abſumſit*, ut totidem verbis refert Suetonius. Sic Cræſo famoſæ ad omnem poſteri-

posteritatem divitiarum, non absque multiplici
 injustitia corrasæ, ad id tantum profuerunt,
 ut moto bello non necessario terribilem o-
 pum suarum vim everteret: Quanto utroque
 prudentior fuit Constantinus Chlorus, qui
 pecunias suas in loculis subditorum, thesau-
 ros in ipsorum benevolentia posuit; atque id
 ipso facto ostendit, cum thesaurorum exili-
 tas, cœu dissolutioris regiminis probrum, à
 Diocletiano objiceretur.

*Non enim the-
 sauri presidia regni sunt, sed amici, quos
 neque armis cogere neque auro para-
 re queas; officio & fide parantur.*

Interim quia admodum multiplicari aurum
 & argentum vetat lex, apparet inde, exces-
 sum, qui ad avaritiam est & ambitionem, hoc
 in genere damnari, non culpari Parsimo-
 niam. Placet Deo, & poscit res ipsa, ut
 reponat Princeps in futurum, quæ ad subita
 belli, ad inopinos casus necessaria putat.

Sed absque vi, absque oppressione subditorum,
 absque omni in terrenis illis fiducia id faciat,
 & Iehova Zebaoth clypeus ipsi erit, & am-
 pla merces.

Hæc sunt quæ Principibus populi sui Deus
 imperat. Hæc sunt quæ lex fundamentalis
 Principatus Christiani requirit. Hæc sunt
 quæ populi Christiani Princeps Christianis-
 simus Elector FRIDERICVS facit; & con-
 stanti tenore deinceps facere sibi propo-
 suit. O beatum populum Palatinum, cu-
 jus Iehova Deus est! O beatum populum
 Palatinum, cuius lex Dei moderatrix est!
 O beatum populum Palatinum, cuius Prin-
 ceps imperio Legislatoris Dei, jussu Legis di-
 vinæ subditus est! *Non ita fecit Deus noster
 multis populis.* Peculium Palatinum tot
 tantisq; ejus favoribus tripudiat. Videte
 quem unxerit Iehova in Antecessorem super
 Possessionem suam. Coram Iehova assidet
 Unctus ejus. *Multò pulchrior es filiis homi-
 num; infusa est gratia labiis tuis; Accinge gla-
 dium tuum super femur, o robuste, Et terribilia
 ede documenta dextera tua. Populi tibi proci-
 dent, inimici tibi procident, ambulantes in in-
 gritate animi tui. Non propones tibi ab oculis
 rem nefariam. Cor perversum recedet à te:
 Malum hominem non agnosces; Ladentem lin-
 guâ,*

guâ, elatum oculis, tumentem animo ipsum non
feres. Oculi tui attendent ad veraces terra ut
confideant tecum. Ambulans viâ integrâ is mi-
nistrabit tibi.

O Deus, da judicia tua
Electori, & justitiam tuam filio Electoris. Ju-
dicet populum tuum justè, & pauperes tuos ju-
re. Proferant montes pacem populo & col-
les propter justitiam. O Deus, dies diebus Ele-
ctori superaddito; anni ejus sint ut multarum
generationum. Maneat in seculum coram te;
benignitatem & fidem prepara, quæ custodiant
cum.

Auxilium Tuum sit Jehova qui fe-
cit cælum & terram. Ne permittat dimove-
ri pedem Tuum; ne dormitet custos Tuus. Ecce
non dormitat neq; dormit custos Electoris. Je-
hova custos tuus; Jehova umbra tua. Is ser-
vabit animam tuam ab omni malo; Is servabit in-
gressum tuum & egressum ex hoc tempore usque
in seculum.

Benedictus sit Jehova Deus
noster, qui facit mirabilia solus. Hic est dies
quem effecit Jehova; exultemus & letemur in
eo. Surculus de radice Palatina excrevit
in arborem. Lucerna fumigans domus Pa-
latinae erupit in coruscantem & constantem

flammam. Omnia sub Trajano Imp.
 bene futura cornix cecinit. Omnia sub
 FRIDERICO V. Electore bene futura Uni-
 versi canimus. Sis pius, sis probus, sis ju-
 stus, sis clemens, sis fortis, sis felix, sis longi-
 vus; sis Pater patriæ, sis Dominus æquus &
 bonus; sis amor & deliciae generis humani,
 sis temporum tuorum felicitas; sis Scipione
 fortior, Augusto felicior, Trajano probior;
 sis Davide religiosior, Salomone sapientior,
 Iosia humilior. Quicquid uspiam virtutis
 est, in te congregetur; Quicquid uspiam fe-
 licitatis est, in te corrivetur; Quicquid us-
 piam laudatorum exemplorum est, in te re-
 novetur. Vivat, vivat Elector FRIDERI-
 cus, floreat Domus Palatina, prosperè a-
 gat Palatinatus, augeatur Ecclesia, amplifi-
 cetur Academia. Hæc vota, deside-
 ria, suspiria ad Electoratus tui initia, Prin-
 ceps FRIDERICE, Universi ferimus.
 Optat hoc Senatus, vovet Academia, pre-
 catur Ministerium, omnium ordinum con-
 fessus sperat. FRIDERICE Elector, Deus
 Te servet, Princeps Palatine Deus te servet.
 Sena-

enatus suo loco est, quia Tu Elector; Senatatus jus dicit, quia Tu Princeps; Senatus bene consulit, quia Tu Dominus.

FRIDERICE Elector, Deus Te servet, Princeps Palatine Deus te servet, Patrocinii Tui aura spirat Academia; Clementiæ Tuæ favore Rector Magnificus præest; Benignitas Tuæ continuatione hæ cathedræ, hæc pulpita Doctissimorum Professorum vocibus resonant.

FRIDERICE Elector, Deus Te servet, Princeps Palatine Deus Te servet; Ministerium Sacra dispensat Te nutritio, pauperes curat Te largitore, disciplinam exercet Te vindice.

FRIDERICE Elector, Deus Te servet, Princeps Palatine, Deus Te servet; Tuo beneficio tam amplæ spei juvenus eruditur; Tuis auspiciis tam nobiles in Academia conventus augentur; Tuâ Gratositate allecta spectabilis hæc auditorum corona ad plausus, lætities, exclamationes certatim accurrit.

Sauem Regem sequuti sunt, quorum corda inclinavit Deus: FRIDERICUM Electorem omnes sequuntur, quia omnium corda inclinatur.

clinat. Postremò iterum iterumq; repetitis
votis prioribus benedicamus Electori No-
stro, eumq; faustâ acclamatione comitantes
redeamus ad sua singuli tentoria; læti & hi-
lares animo de toto illo bono, quo affecit
Iehova ELECTOREM FRIDERICUM Ser-
vum suum, & PALATINATUM ELEC-
TORALEM populum suum.

*Huic Regi aeterno, incorruptibili, invisibili,
soli sapienti Deo, Regi Regum & Do-
mino Dominantium sit laus, ho-
nos & gloria in secula secu-
lorum. Amen.*

FINIS.